

華

陽

集

四





華陽集

(四)

王珪撰

# 華陽集卷二十六

## 內制

宋庠授依前檢校太尉同中書門下平章事充河陽三城節度使營國公加食邑實封功臣制

門下蓋聞在天之象主布政于大辰在國之陽有通神之虛府日者攷諸儒之議傳六經之文鑑軒皇拜帝之圖舉姬周陟文之典敢曰能饗又茲歷年粵季秋之嘉辰會五氣之精德師象山則之固孝奏天儀之光慶靡專承法繇近始具官某材經物表知覺民宗冠天下之倫魁賁賢人之器蘊文章載道該古今治亂之原醕粹發衷有東南溫厚之氣謀一王之治體秉二府之神機屬奉堂筵之禮適寄闔符之劇維登歌之奏既聽歆安之章維贊享之辭既授泰元之策嘉方貢之備物輯靈釐之昭庭載稽功令之書更錫輔臣之號拓素荒之奉邑衍常人之眞租咨合至公渙爲丕命於戲天之格祀固多右善之祥朝之祿賢亦先發爵之事蓋禮緝則澤鉅德隆則報豐益敷令猷以答鴻施

呂公弼授依前樞密使光祿大夫加食邑制

門下朕初承邦序適攷郊年緣景德之祀文卽泰禋之齋宇乃輯大事以賓上神一心率祗萬福來下豈不繫左右之輔時則有夙夜之勞因慶澤功不可稽命具官某氣節修固機猷碩膚志薄簾金早勉韋成

之學。材施廟棟。夙推蔡伯之名。被宸遇于三朝。長樞密于右府。肆飭躬于肇祀。能協事于先期。使萬兵陳衛于國中。四夷觀樂于簾下。而復奏中嚴于大次。導初獻于重垓。舉無陟降之違。終有質誠之助。既燭成于吉報。宜大渙于神釐。載加馭貴之階。載益表功之號。仍敦封于采邑。並副寵于近司。於戲。德當天心。已格靈娛之應。禮行祭日。且觀惠術之孚。益厲至顯。共綏鴻施。

韓絳授金紫光祿大夫同中書門下平章事昭文館大學士加食邑實封功臣制

門下三王臣主。雖賢不能止誥誓之事。二帝揆岳在內。其惟協天人之和。蓋近跡狹而易循。至化默而難運。夫欲馳寥廓之見。舍轡拘之文。大起不世之君。須謀非常之輔。具官某。蹈先聖之學。躬上賢之姿。思功名爲己圖。慕忠義之前躅。而復正色自峙。頗有大臣之風。臨機不回。多適庶事之要。文武兼備。其器股肱。實繫其人。朕登延間材。既諧羣策之慮。度軼往制。何愛隆名之私。顧金節之未還。將袞衣之已屬。其位百寮之冠。以司大政之元。且唐相之願爲良臣。終受君以顯號。秦穆之尙詢賢老。猶濟俗于多盤。豈伊英猷。不至上治。於戲。形范正。金錫美。則爲國利器之強。陰陽和。風雨時。則爲天泰階之應。往宣一德。庸底丕平。

除陳升之禮部尙書同中書門下平章事集賢殿大學士加食邑實封制

門下天有三階。則風雨不失其序。聖如二帝。然股肱亦繫其人。朕上撫乾緯之明。下慎國鈞之寄。方審求于賢輔。俾參穆于政途。若時登庸。蓋出定命。具官某。識幾聖蘊。謀合皇猷。學積于原。而心彌充。智酬于變。

而力彌裕。早膺仁祖之擢。以遺文考之知。肆予冲人。克卽大任。問甲兵則有鎮撫四夷之略。問衣食則有運理羣物之心。朕方稽百王之謨。經一世之績。宜進躡于賢序。以延登于宰廷。夫知歷選之旣艱。體委用之寄重。則義莫得以愛己。道惟專于澤民。豈特無疆之休。亦有無窮之聞。於戲。論金穀之計。其歸內史之司。作霖雨之滋。是應高宗之命。往熙帝載。庸代天工。

梁適授忠武軍節度使知河陽加食邑實封制

門下、魏相守成。嘗輯漢庭之治。召公分政。亦經周室之寧。朕旁求峻賢。圖翊幾務。居以儀刑于百辟。出則藩宣于四方。蓋君臣之道篤。則羣枉銷。內外之體均。則衆功就。眷經邦之舊望。適更闢于近封。賈穆僉謀。肆揚休命。具官某。量閎而履正。資裕而器周。紹家閥之文章。鼓王朝之號令。頃疇碩譽。茂服邇僚。旋參論于政塗。遂登庸于宰席。丹青神化之麗。金玉侯度之堅。自守持于邊符。寢遷回于歲籥。撫秦川之亭障。以懷弗諱之心。臨大鹵之山河。以厭未形之難。忽露章而馳悃。靳易寄以就冲。朕顧德機衡之臣。憫勞疆場之事。進許昌之使節。頒踐土之寬條。賦益眞封。視加崇秩。恩踰常數。禮厚殊勳。於戲。名器國之至公。忠義臣之大節。惟知所遇者極其報。識其遠者圖其終。往迪至懷。益茂前烈。

李昭亮授依前檢校太傅同中書門下平章事充昭德軍節度使加食邑實封功臣制

門下、朕居總章之右个。卜季秋之上辛。載度禮神之筵。益修嚴父之事。去並侑蓋大懼連衽之瀆。專美報

所以略從綴之文。顧廣禮之涓成。導鴻休之來假。迺瞻親賢之輔。夙陪齋祀之勤。宜告朝倫。用孚神錫。具官某。器懷閎達。風識沈雄。出山西之將家。爲太任之后族。蟬聯疊世之舊。感慨四方之行。固嘗施露甲之勞。輯奉旗之略。中提禁旅之衝。而夕警嚴于勾陳。北筦留都之符。而天聲愴于大漠。旣踐齋壇之貴。旋登台袞之華。勳幾上于太常。職用祇于珍館。清都留侍。祕幄來謀。肆予大事之竣。首以慶條之舉。褒功庸于美號。衍封食于上腴。以懋爾恩。以旌爾德。於戲。世有不烈。已同帶礪之盟。時維壯猷。又錫山川之履。往肩乃服。益厲厥修。

李端愿授武康軍節度使知相州加食邑實封制

門下。秉鉞臨戎。式長萬夫之政。分符作屏。聿圖四國之寧。我得沈雄之英。實出勳戚之緒。肅申褒律。誕布治朝。具官某。氣和而弗流。體強而不倚。趨庭聞訓。早從詩禮之游。累組承榮。獨遠綺紈之習。自居留務。寢易年華。肆予親政之初。間有納忠之益。且平陽故館。每念音徽之遐。而隴右名門。終緣氣俗之勇。是用按邊之瑣。稽地之圖。付洋川之整軍。擇彰德之便鎮。就領將牙之重。往專閫制之雄。加食戶田。併推異數。於戲。胡轉予恤。戒祈父之靡聰。雖不學兵。仁嫺姚之前略。益肩壯慮。以稱茂遷。

程戡授安武軍節度使加食邑實封判延州制

門下。周禮命卿。司馬掌國征之事。漢儀遣帥。將軍額閫制之權。自非謀經帷幄之咨。名厭疆陲之難。則何



以稽圖而受社。賜律以臨戎。茲疇舊政之良。式協師虞之望。具官某。體忠忱之度。蹈夷雅之風。進掌藝文之華。仕階名秩之臚。方先朝之顓俊。更三府之告猷。左右六年。夙夜一節。肆纂休于皇緒。適留寄于邊衝。空深寤寐之思。且重安危之倚。上金城之方略。猶知充國之強。習闕里之絃歌。還見祭遵之佚。就付兩河之節。洊綏西土之封。既衍食于爰田。復倍輸于眞戶。風聲雖舊。寵數維新。於戲。制夷狄者。備不可遽忘。守方隅者。勢不可數易。蓋威素申。則敵情讐。信久著。則士心懷。尙堅壯圖。往服渥命。

郝質授殿前都指揮使安武軍節度使加食邑實封制

門下、國家統御之勢大。維持之業隆。外倚四嶽藩翰之臣。中謀萬夫貔虎之帥。故奉委裘而羣情固。聞受瑁而三靈趨。肇臨發政之辰。首下頒朝之命。具官某。性資莊厚。氣略沈雄。通玉帳之善經。體金行之正氣。自昔先帝。知爲勁臣。因其勤舊之名。立在親信之地。會綴衣之陳牖。提衛甲之環官。曾無夜磬之譁。自得剛牙之重。紹帝符于景祚。渙邦號于前彝。視秩冠于文昌。徙節臨乎安武。加以總正使範。敦封并腴。並旌巖陞之勞。以表師干之寵。於戲。天之壁壘。象在羽林。王之爪牙。職于祈父。蓋地嚴則必資拱扈之力。師衆則猶賴訓齊之方。往堅壯圖。思答殊遇。

翰林學士知制誥曾公亮封廬陵郡開國侯加食邑制

門下、朕躬執祿主。奏瑞文之曲。夙戒齋輅。次欽天之居。乃景至未明。大饗于帝。而孝思無極。並侑我先。翁

受百神之釐。首敷衆哲之侍。具官某。行純而節正。色裕而氣嚴。入典禁林之詞。出孚邦號之渙。久侍華光之席。日窮經術之淵。休有德名。賁諸器蘊。屬親大事之報。包舉上儀之文。奉璋趨前。旣陪祠位之肅。端弁拜俯。又助精誠之通。還朝清明。班時福順。進階所以馭貴。疇邑所以修封。勉爾令圖。祇我渥命。

曾公亮授門下侍郎兼吏部尚書依前同中書門下平章事進封英國公加食邑實封功臣制

門下大火基宋。實開五聖之符。六龍乘乾。遂繼中天之運。乃睠近弼。游更三朝。元勳冠于百僚。利澤施于萬世。載錫穀旦。敢告治廷。具官某。學通天地之微。謀合聖賢之舉。苞剛柔于九德。固夷險之一心。蚤膺皇祖之求。爰履公台之位。有皋夔之論。能變堯民于時雍。有丙魏之聲。不改漢家之故事。肆我文考。遺予冲人。咨顧命之老臣。輔初政于天下。重宣至策。終仰丕成。進首中臺之班。往顯東省之務。旣疏榮于公社。益躡數于爰田。功之所加。寵不敢後。於戲。恐德弗類。念高宗之未言。俾民不迷。繫尹氏之素力。共祇天監。永協邦休。

曾公亮授尚書左僕射依前同中書門下平章事進封兗國公加食邑實封制

門下上天之緯。運大時。不能以全功。睿主之撫。統羣物。不能以獨化。矧予眇德之御。方攬萬幾之難。實仰成于輔臣。以經起于邦治。爰旌丕烈。庸告羣倫。具官某。明允篤誠。溫恭迪哲。動合聖賢之檢。言形社稷之忠。蚤選聖期。遂儀台路。子孟之承先帝。預定于大謀。召公之保三朝。率躬于一德。乃眷宣勞之舊。未昭報



禮之隆。其總揆于中臺。益修封于大國。加以爰田之數。陪之眞戶之輸。誕維寵章。優我茂宰。於戲。王命山甫。式是百辟之瞻。天錫魯侯。祚爾千秋之福。更恢遠御。永弼昌圖。

曾公亮依前同中書門下平章事進封魯國公加食邑實封功臣制

門下。夫物生本乎天。人道始于祖。故有天下不可不嚴大報。爲人子不可不怵孝思。朕肇禋紫壇。先薦清廟。誕舉合祚之事。遙遵定配之彝。維時顯相之臣。有若元勳之老。宜先列位。以渙不謨。具官某。躬咸德之良。履上宰之任。運理羣物。人厚衣食之原。鎮撫四夷。時無兵革之氣。候景初至。因丘自圓。朕旣執裸玉以見祖宗。又將滌牲器以事天地。而上下莫不有嘉德。內外莫不有歡心。高靈嘉虞。休應顯見。茲庸加爾以太常之功號。錫爾以東魯之大邦。而復益以爰田衍之眞賦。並躡寵名之異。以俾賢業之隆。於戲。攷越紉之文。知尊祀之不敢廢。修歸賑之禮。顧神惠之不敢專。往承之休。更起予治。

曾公亮依前同中書門下平章事昭文館大學士加食邑實封制

門下。王者。攬髦傑以盡天下之謀。總幾神以濟天下之務。故君臣同力。相得益彰。陰陽並和。以至大治。適登碩輔。庸告羣倫。具官某。德應中孚。道經皇極。躬清慎之一守。歷險夷之百爲。巫咸之乂商家。雖載六臣之烈。留侯之安漢祚。未膺上宰之榮。朕拂龜而見祥。端展而定志。稽用師言之錫。進居台路之元。若股肱之輔。予躬若垣墉之保。予室顧于倚用。維以蒙成。於戲。覽前載之文。考名臣之事。蓋創業之佐其迹易。而

守成之相其功難宜勉輯于盛猷庶共恢于遠御。

曾公亮守司空檢校太師兼侍中河陽三城節度使集禧觀使仍賜功臣制

門下、朕緬尋前載之文、樂見名臣之節、蓋位至者予國、心有加于澤民、功成者本天、道惟在于挹己、眷肅艾之一德、積勤勞于我家、每循往昔之休、不以三公爲重、誕敷贊冊、以告治廷、具官某、懷器適時、潔身絕類、蚤逢熙于神運、寢發緼于賢謨、膺二后之顧言、奉冲人于大統、自初輔政、十有五年、而四夷守于封疆、百姓遂其衣食、匪圖近歲、繼託一誠、深據禮經之陳、欲還君務而去、維終食而屢嘆、卒高情之莫回、況留侯未衰、何遽遺于人事、且周公雖老、顧猶在于京師、其保宏父之居、兼筦納言之任、高旌鉅節、遙臨踐土之津、閒館珍臺、獨揖浮丘之袂、昭美勳于廟器、抗逸志于朝倫、雖云優賢、蓋亦礪俗、於戲、以退爲進、蹈天下難儷之風、不德其功、應君子有終之吉、往祇茂寵、更穆英猷。

王安石授金紫光祿大夫禮部侍郎同中書門下平章事監修國史進封開國公加食邑實封功臣制

門下、夫天地、至神也、非統氣運物、則功不足見于時、聖賢、一道也、非經世俗民、則名不足見于後、故士莫不待辰而欲奮、志莫如得位而遂行、矧夫居三公之官、而有臨四海之勢、豈不能究利澤、躬義榮、以事施于一時、而譽動于後世者哉、具官某、良心不外、德性攸尊、至學窮于聖人、貴名薄于天下、不以榮辱是非

易其介不以安危利害辭其難。方予訪落之初。勞于用賢之務。昭發猷念。預裁政幾。衆譽所傷。曾靡捐身之憚。孤忠自許。惟知報國之圖。朕與其知道者深。倚以爲相者久。茲合至公之首。肆敷大命之休。若作室用。汝爲垣墉。若濟川用。汝爲舟楫。予有違而汝弼。汝有爲而予從。于時大亨。蓋出絕會。於戲。自成湯至于帝乙。靡不懷畏相之心。若孟子學于仲尼。其惟達事君之道。尙祈交飭。卒俾蒙成。

翰林學士承旨吏部侍郎王拱辰加勳邑制

門下。朕美詩頌之章。恭成命以昭天地之報。索豫卦之象。作新樂以崇祖考之配。乃己巳右饗。越昧爽肅成。百神祇歡。萬寓蒙祉。疇相予事。思懋爾恩。具官某。以高文鉅學。冠豪英之第。以美德碩望。預禁嚴之游。以至持肅政之綱。而風采厲于廷右。總司會之計。而智略轅于天下。自陪繹于經侍。已更寄于閫劇。比詔欽柴之卜。參使容範之司。惟獻禮之靡不詳。惟宗器之靡不序。亦既有就。時乃之力。進以勳府之等。益以井賦之奉。勉茂而業。往欽台寵。

翰林學士禮部侍郎知制誥楊察加勳邑制

門下。帝者壹華夏之歸。所以率三歲而大報。聖人尊祖考之奉。莫如合兩儀而並侑。朕揆天之正。旣以嚴躬饗之禮。擁神之祐。則必均祇事之臣。維予雋德。用先寵格。具官某。美爲國材。裕有賢略。北門之直。冠文雅于禁中。京兆之治。號神明于轂下。比詔熙事之舉。卽委中折之置。自薦鬯終室。而備駕徂郊。使玉輅安。

于天衢。壺漿勤于王旅。介福之始。第勤則多。進勳府之茂級。加縣田之眞賦。勉荷渥典。思報榮遇。

工部侍郎余靖魏瓘加食邑制

門下。朕執鬯于廟。奠玉于丘。神靈祇歡。既交上下之祀。德澤均貺。靡殊中外之寄。有懷邦彥。并介時休。以爾具官某。資適于世。韞強銳之略。以爾具官某。學粹于古。蹈夷雅之方。並貳文昌之卿。交持五筦之節。日者。蠻荒狂肆。嶠俗震駭。維番禺之會。民物歛困。時則須寬厚之術。維桂零之交。夷落雜處。時則賴威懷之孚。肆予大事之熙。適有南陬之滯。進勳昨邑。蒞福之從。予念遠人。重申茲訓。

內侍省內侍左班都知史志聰等加勳邑制

門下。報莫隆于天地。故親祠之禮鉅。孝莫尊于祖考。故並侑之典嚴。朕迎至于吉序。接神于泰時。精誠之交。則福瑞靡不應。熙事之就。則澤施所以均。維予信臣。不可後賞。具官某。忠慎而節厲。幹肅而材通。更事寄固。已著邊障之勞。稽恩勤蓋。有承軒闥之舊。迺齋輅夙駕。而密扈星輝之行。及帷宮大次。則親督夜蠶之警。屬已祀布釐之浹。承進勳衍賦之厚。茂服予寵。益懷爾恭。

金吾衛上將軍除邊鎮節度使制

門下。聽鼓聲。則有將帥之思。執干戈。則有社稷之衛。故齋壇以重其拜。侯社以寵其封。匪咨材臣。曷寄大事。爰諏令日。以告明廷。具官某。忠義之姿。剛正之氣。向更使檠。有霜露戎馬之勞。入衛宸居。有夙夜軒墀。

之格。公言來稔。風績具宣。朕惟師律之嚴。安危所倚。材不勝任。器將假人。今其命汝大邊之衝。百城之會。旄鉞之盛。爪牙之雄。爾其講軍籍之和。輯民版之衆。爲吾巨屏。殿于一方。於戲。王柄之馭羣臣。實先乎詔爵。武經之有七德。所重乎戢兵。惟方嚴。可以懾羣姦之萌。惟沈勇。可以決千里之勝。往服休命。無忘欽哉。

除李璋殿前副都指揮使武康軍節度使制

門下。羽林神兵。北環天衛之象。黃帝李法。中嚴邦律之師。國家鬯武。節于四遐。提禁屯于千列。進總凝嚴之護。歷圖勁傑之資。稽衆得人。告廷孚命。具官李璋。氣沈而果。事性裕而知方。厲許國之單忠。達治兵之善志。緒服高華之望。名推親信之良。朕念長樂之慈。愴不及養。顧渭陽之族。聞蓋多賢。自擢領于戎昭。已積遷于留寄。屬巖除之缺帥。宜齋鉞之命才。六纛啓途。旣襲重侯之貴。萬兵留帳。方資緩帶之安。雖其素勞。不曰異寵。於戲。執干戈則有社稷之衛。常慎于假人。聽鼓鼙則有將帥之思。實深于注意。維蹈忠義者。急于報主。蓋喜功名者。要之逢時。勉規壯圖。尙率明訓。

李璋授依前武康軍節度使加勳邑制

門下。朕肇禋陽郊。先事世室。禮行而孝慈服。誠至而福瑞熙。參繹內外之勞。合孚上下之施。疇先列位。我有勁臣。具官某。性稟沈雄。材資敏濟。蹈世忠之一節。明軍志之大方。況西京之外家。實先帝之內弟。千廬列衛。入提禁旅之巡。十乘啓行。出總藩旄之寄。輯敷士訓。獨弭民苛。屬講宗族之文。首虔方貢之職。肆靈

娛之昭聽。按獎典以均休。陪以列戶之封。錫之茂勳之等。茲爲異數。以格前彝。於戲。有命自天。甫渙風霆之號。乃心爾位。尙綏車服之榮。不顯其承。維真無斁。

李璋依前殿前副都指揮使武康軍節度使加食邑實封功臣制

門下。夫物莫不本于天。人莫不嚴于父。朕靡牲玉之愛極。所以反始之祈。感霜露之臨怵。所以奉先之饗。于是稽祥符之肇志。酌皇祐之闕文。載燭路寢之居。以放合宮之位。音和而羣物至。孝奏而上靈通。翕受天符。發爲邦渙。具官某。性質沈毅。材謀肅良。洞于三略之微。隱然萬夫之禦。蹈世忠于舊閥。懋邦器于遠途。朕富有中區。靡逮親顏之侍。恩流外戚。莫隆舅族之賢。固已仗帥鉞于殿除。襲侯章于茅社。會講大事。倚綏勁臣。自齋居紫闥。肅陳千列之衛。迺順祗清廟。安護六飛之嚴。適拜胙于禋庭。首議勞于盟府。功以號進。勳如賦加。式推神惠之蕃。並爲師服之寵。於戲。保富貴之匪易。而要德之所以終。期功名之匪難。而要時之不可失。往率至訓。益思令圖。

曹偁授保平軍節度使加食邑實封制

門下。朕承景歷之昌。嗣丕構之重。渙敷大命。胥澤羣元。咨我方岳之良。時維屏翰之憲。念宣勞于劇委。稽渙獎于陟文。卜以剛辰。告于列序。具官某。體冲韻邃。氣勁謀沈。傳圯上之神書。託西京之肺腑。允顯祖烈。實爲宗臣。於皇母儀。克后先帝。濟忠純于奕世。履謙劼而保躬。鬯共武之威。迺踐元戎之貴。助守文之德。

式繁外戚之賢。進導徽猷。參聯台路。肆質膺于聖統。方倚輔于英藩。載疏冢社之榮。增視上公之峻。隆階表貴。衍食敦封。萃爲寵休。以睦婣近。於戲。詔爵祿之柄。天官以馭夫羣臣。錫車馬之儀。大雅以褒夫元舅。蓋績美則報之厚。愛隆則禮亦蕃。往懋淑聲。永綏多福。

曹佾授檢校太傅依前同中書門下平章事加食邑實封制

門下。朕蒙遺休于上帝。集大命于我家。惕惟重器之承。浩若巨川之涉。澤旣更于民始。勞亦獎于賢猷。乃告大廷。用孚羣聽。具官某。緒承慶閼。稟有忠樞。遠驕華之末遊。傳奇正之舊學。追武惠之烈。早從清廟之祠。念慈壽之恩。正極萬方之養。故雖路車駟馬。台絨將旄。猶未足以褒外戚之賢。踵西京之事。矧獲膺于繼序。益申按于陟文。視以太傅之班。易于昭德之節。維爰田之旣衍。遂眞賦之載加。議莫攸違。寵皆是稱。於戲。親連肺腑。可輕富貴之來。世載旂常。宜念功名之舊。勉殫誠瘁。終保恩輝。

李日尊授靜海軍節度使加食邑實封功臣制

門下。嚴帝親者。茲維聖人之事。觀禮樂者。必于王者之庭。朕述三代之遺文。宗五精之美報。至晉治奏。法物具陳。升柴燎之光。以拜上旻之施。零蓼蕭之潤。以澤四海之遐。懋賞以勞。頒朝有命。具官某。器懷英達。忠義堅明。世享南交之封。心馳中夏之化。肆精禋之丕舉。懷順節之素勤。錯事合宮。有嘉方貢之舊。策勳太寢。疇先爵典之行。茲用錫號雲臺。表功彝器。衍以爰田之戶。陪以眞食之科。薦美壯猷。益昭異數。於戲。



教民以孝。固以配文考之功。均國之釐。不敢後列藩之服。惟惠愛可以懷衆。惟誠忱可以感神。往迪于休。永綏爾土。

李日尊進封南平王加食邑實封制

門下。朕荷上穹之錫命。承先帝之顧言。在疚而哀。靡勝臨阼。而懼弗類。欽循故典。大澤羣方。咨爾世藩之臣。虔于內貢之職。匪申丕誥。曷表嘉庸。具官某。忠實孝恭。剛明肅果。學洞詩書之蘊。誠逾金石之堅。地宅南交。盡化海隅之俗。義尊帝室。常傾日下之心。屬纂極之初辰。謹頒朝之大政。定訪太宮之策。趨論盟府之書。進王爵之崇徽。益爰田之多賦。以大爾土宇。以華爾人民。於戲。銘在鍾彝。已載世功之舊。誓如河嶽。更均邦祚之長。往迪順猷。永有吉祿。

嘉勒斯寶原作噴嘶囉今依通鑑輯覽改授保順河西節度使食邑實封制

門下。朕膺天寶命。纂國鴻圖。內則股肱大臣。以維社稷之固。外則藩衛羣后。以禦封疆之衝。矧當眎政之初。敢後疇庸之典。誕孚廷渙。賈穆師僉。具官某。氣概沈雄。知懷明果。世宅西方之勁。心勤內府之輸。忠義貫乎神明。威聲懼于區落。師牙古勝。早專鈇鉞之征。盟府書勞。舊載山河之誓。肆承先帝之序。申需有邦之遐。進馭貴之崇階。均班朝之偉望。陪之多戶。衍以眞租。並懋寵光。以華夷等。於戲。勳屏王室。固無闔外之虞。命契天心。適及景風之候。蓋恢世烈者。譽其永。更民始者。澤非常。勉綏順猷。欽服徽數。

嘉勒斯賁授依前保順河西節度使加食邑實封功臣制

門下、夫宅天下之尊。必飭上神之報。篤人子之孝。必嚴先烈之思。朕親執豆籩。祇見郊廟。乘一氣之復。以體天施之仁。合萬靈之休。以孚邦渙之號。疇膺丕制。首飭諸藩。具官某。蚤承世封。躬履侯度。作屏于外。自雄夷落之師。述職于中。有虔王府之貢。肆若初之撫御。尤不失其順祇。適峻祀于園丘。宜冊勳于太寢。爰益褒功之數。用閔守土之聲。昨以爰田。陪之眞賦。併推異等。庸答素勞。於戲。維皇德澤之均。始于近而加于遠。維臣忠義之節。善其始者惟其終。勤宣令猷。永錫蕃祉。

董戡落起復依前保順軍節度使加食邑實封制

門下、四封之守。仗許國之素勳。三年之喪。爲報親之達禮。乃眷西屏。時維偉臣。方終纂于戎縵。盍還儀于命軌。我有明制。格于丕彝。具官某。以材資之雄。自高于夷落。以誠節之勁。蚤衛于王家。獨探神輶之奇。時歸宰旅之貢。適靖邊瑣。奄罹父難。起素絰于廬中。屬駢旄于闔外。銘在金石。具獎一心之勤。誓如山河。盡荒先正之履。維是苴麻之飭。亦旣日月之除。肆下書于外廷。式加寵于舊服。昨以爰田之戶。陪之眞井之租。用嘉乃勞。丕顯亦世。於戲。白駒過隙。忽驚祥事之陳。金鉞傳家。更愴元戎之略。忠孝並務。夫不美歟。